



14. oktober 2009

Inatsisartut suleriaasianni § 36 imm. 1 naapertorlugu Naalackersuisunut apeqqut imaattoq matumuuna saqqummiuppara:

Namminersorlutik Oqartussat illuutaanni attartortittakkani 400-ini 30-399-inik taaneqartartuni, ineqarnermut 51% qaffaanissaq ilumut najugaqartut tamarmik aningaasatigut nammassinnaanerat qulakkeerneqarsimanerluni? Innissiarsuarni aserorterisarneq serlersaarisarnerlu pillugit akitsuinissaq najugaqartunut tutsinnginnisaanik allamik periarfissaqarnerseq misissuisoqarsimanerluni?

AG-imi nr. 72, 6.oktoberimi saqqummersumi Naalackersuisut Siulittaasuat ima issuarneqarpoq, ”Pissusissamisoorpoq pisortani atorfillit akissarsiakkaat inissianik attartortut nalinginnaasut akiliutigisartagaasa qaffaseqataanik akiliisalernissaat”.

Soorunami taamatut oqariartuuteqarnera tunngaviatigut isumaqatigaarput. Kisianni paaserusunarpoq ilumut qulackersimaneraa illuni taakkunani 400-ini najugaqartut ilumut taamarsuaq qaffaanissaq tamarmik nammassinnaaneraat?

Paasiniaanera malillugu illunit taakkunanga 41-it taamaallaat Nuummiipput, taakkunangalu taamaallaat 9-it pisortanit (chefbolig) najugaqarfigineqarlutik. Sinneri 350-it missaat sinerissami aggulussimapput. Innuttaasullu tusagassiorffinnut tutsiutillattaarneri tunngavigalugit paasivarput najugaqartut tamarmik tassaanngitsut akissarsiarissaartut. Killormuanik oqariartuutigivaat qaffaanissaq taamak annertutigisoq ilaqutariittut nammassinnaannginnamikku allatut ajornartumik najugarisatik qimattariaqalersinnaagaat. Kisitsisinimi assersuutitut takusinnaavagut illut taamaattut 53-it Tasiilamiittut 22-illu Qaanaamiillutik. Naatsorsuutiginnilaralu taakkunani najugallit tamarmik Naalackersuisut Siulittaasuata oqarneratut akissaatigissaartuussasut.

Tupinnartorujussuuvoq Naalackersuisut siulittaasuata oqariartuutigisartakkami killormorluinnaanik iliuuseqarnera. Nalunngilarpummi aamma qineqqusaarnermi sukataarutigisaraa, innuttaasut atugaasa assigiinnginnerujussuata qanoq iliuuseqarfigineqarnissaat. Nammineeerluni Naalackersuisunut Siulittaasunngornermini aatsaat iluamik naligiinnginnerup annertusarnissaa siuttuuffigivaa. Soorlumi aamma meeqqat atuarfianni angajullit akissaatikinnerusunik angajoqqaallit tapisiaqartarnerisa atorunnaarsinneqarnissaat siunnersuutigigaat.

Innissiarsuarni aserorterisarnerit/serlersaarisarnerit pissutigalugit ineqarnerup akitsorneqarnissaa najugaqartunut sussuseqanngitsunut tutsinneqannginnissaa pinngitsoortinniarlugu allatigut aaqqiis-sutissamik Naalackersuisut misissuisimanerlutik?

Eqqarsaatigineqarsinnaannginnerluni meeqqat atuarfiini inuusuttullu ornittagaanni serlersaarisarnerit pillugit angajoqqaat aningaasaqarnerannut qanoq kingunipiloqarsinnaaneriniq paasisitsiniaasoqarnissaa?

Imaluunniit majuartarfeqarfiit paarnaqqasartunngorlugit, tassa najugaqartut kisimik isersinnaasunngorlugit aaqinneqarsinnaanerit aningaasatigut siunissaq ungasinnerusoq eqqarsaatigalugu akikinnerusinnaanersoq misissorneqarsinnaanerluni?

Inussiarnersumik inuulluaqqusillunga
Malik Berthelsen, Siumut